

LETTRE DV ROY
AVX GOVVERNEURS
DE SES PROVINCES,



A PARIS,

Par FED. MOREL, & P. METTAYER,
Imprimeurs ordinaires du Roy.

M. DC. XVII.

Avec Privilege de sa Maiefté.

ROYALTY

THE NEW YORK

THE NEW YORK




A. P. A. R. I. S.

THE NEW YORK

THE NEW YORK

M. D. C. X. V. I. I.

THE NEW YORK



LETTRE DV ROY
 AUX GOUVERNEURS
 des Prouinces.



MON COVSIN,

Je ne doute point
 que dans le cours
 des affaires qui se
 sont passees depuis la mort du
 feu Roy Monseigneur & Pere
 (que Dieu absolue) Vous n'ayez
 facilement remarqué comme le
 Mareschal d'Ancre & sa femme,
 abusans de mon bas aage, & du
 pouuoir qu'ils se sont acquis de
 longue main sur l'esprit de la

Royne Madame ma mere, ont
proietté d'vsurper toute l'au-
thorité, disposer absolument des
affaires de mon estat, & m'oster
le moyen d'en prendre cognois-
sance: dessein qu'ils ont poussé
si auant, qu'il ne m'est iusques
icy resté que le seul nom de Roy,
& que c'eust esté vn crime ca-
pital à mes officiers & subiects
de me veoir en particulier, &
m'entretenir de quelque dis-
cours serieux. Ce que Dieu par
sa toute bonté m'ayant faict ap-
percevoir & toucher au doigt le
peril eminent que ma personne
& mon estat encouroient dans
vne si desreglee ambition, si
i'eusse donné quelque tesmoi-
gnage de mon ressentiment &

du desir extreme que i'auois d'y
 apporter l'ordre requis , i'ay
 esté contrainct de dissimuler &
 couvrir par toutes mes actions
 exterieures, ce que i'auois de bon
 en l'interieur, en attendant qu'il
 pleust à ceste mesme bonté me
 preparer la voye & l'opportuni-
 té d'y remedier. Sur ce il est ar-
 riué que depuis quelques iours
 plusieurs personnes de qualité,
 tant de ma bonne ville de Paris
 que de diuers autres endroits de
 mon Royaume , prenans occa-
 sion de l'absence dudit Mares-
 chal qui s'en estoit allé en Nor-
 mandie, en deliberation d'y faire
 du seiour , se feroient adressez
 à la Royne madite Dame &
 Mere, & aux ministres (que ledit

Mareſchal & ſa femme auoient
 eſtablis pour ſouz eux & à leur
 volonté manier ſeuls les affaires
 de cet Eſtat) & leur auroient
 viuement repreſenté qu'il eſtoit
 extrêmement neceſſaire de me
 faire agir promptement & à bon
 eſciant en l'adminiſtration de
 mes affaires, autrement que mon
 Royaume qui ſe ſouſleuoit de
 routes parts par ce manquemēt,
 eſtoit ſur le point d'vne entiere
 ſubuerſion: dequoy ledit Mareſ-
 chal d'Ancre ayant eſté auſſi toſt
 aduerty, il ſeroit reuenu en gran-
 de diligence, & d'abord auroit
 par ſon pouuoir & par ſes arti-
 fices, non ſeulement voulu faire
 eſtouffer ces ſalutaires ouuertu-
 res & propositions, comme con-

traire à son dessein : Mais encores auroit resolu de me priuer des moyens de les effectuer, par des conseils que i'ayme mieu taire que publier. Ce qu'estant plainement venu à ma cognoissance, Et considerant qu'outre le peril de ma personne, la haine publique que l'on portoit au gouuernement de ces gens là, auoit tellement aigry & alteré les esprits dans mon Royaume, qu'il couroit fortune d'un embrasement vniuersel si ie differois d'auantage à y pouruoir. Poussé de ces iustes considerations, & du Conseil que Dieu m'a inspiré en ceste occasion : Je me suis ce iourd'huy resolu de m'asseurer de la personne dudit

Mareſchal d'Ancre, Ayant com-
 mandé au Sieur de Vitry Capi-
 taine de mes gardes de l'arreſter
 priſonnier dans mon Chateau
 du Louure. Ce que voulant exe-
 cuter, ledit Mareſchal d'Ancre
 qui eſtoit extremement accom-
 pagné à ſon accouſtume, ayant
 voulu faire de la reſiſtance avec
 ceux de ſa ſuite, il ſe ſeroit tiré
 quelques coups, d'aucuns des-
 quels il auroit eſté porté mort
 par terre. En ſuite j'ay faict
 arreſter ſa femme, enſemble
 aucuns des ſuſdits miniſtres, &
 ſupplié la Royne madite Dame
 & Mere, de trouver bon que
 ie prenne deſormais en main
 le Gouuernail de mon Eſtat,
 à fin

à fin d'essayer à le releuer de l'extrémité où les mauuais conseils dōt elle s'est seruie, l'ōt precipité. A quoy i'espere que Dieu me fera d'autant plus volontiers la grace de paruenir, que mes intentions ne buttent qu'à sa gloire & au bien de tous mes subiects: Dont ie vous ay bien voulu donner aduis comme à l'vn de ceux de qui ie faiets vn plus particulier estat: Vous priant de faire entendre ceste action par tout où vostre charge s'estend, & adiouster aux raisons dessusdictes celles que vostre prudence vous fera iuger propres pour contenir vn chacun dans les bornes du deuoir & de l'obeyssance: Vous

employant soigneusement à ce qu'il n'y ait aucune esmotion dās vostre Gouuernement, & que rien ny trouble le repos que ie desire y estre conserué. Que si quelques vns ont des plainctes ou demandes à faire, vous leur pourrez donner asseurāce qu'en s'adressant à moy par les voyes que les bons subiects doiuent tenir en se qu'ils ont à desirer de leur Roy, Ils me trouueront porté à tout ce qui sera de la raison & de la Iustice. Ceste action a esté tellement louée de deça, que l'on n'entend qu'applaudissemēs & benedictions sur moy, pour l'auoir entrepris en vn temps si opportun & si necessaire; l'espe-

re qu'il en fera de mesme par tout ailleurs. Cependant i'ay escrit à mes Lieutenans Generaux en mes armées de les tenir tousiours en estat, à fin de m'en seruir contre ceux qui ne voudront recognoistre mon auctorité. Au premier iour ie vous feray vn autre despeche, & vous ordonneray ce que vous aurez à faire pour mon seruice. Cependant vous prendrez asseurance que si vous me rendez des preuues correspondantes à l'estime que ie faiets de vostre affection enuers moy ; Aussi ne manqueray-ie pas de bonne volōté pour le recognoistre. Je prie Dieu mon Cousin qu'il vous ayt en sa saincte garde.

Escrit à Paris le vingt quatrief-
meiour d'Auril, mil six cens dix-
sept.

Signé,

LOVYS.

Et plus bas,

DE LOMENIE.

